



**Komunikadu Imprensa**

**Munisípiu Ermera**

**16 Abril 2018**

## **JSMP realiza treinamento ba xefe suku no membru konsellu suku iha Suku Liho, Postu Administrativu Railaco, Munisípiu Ermera**

Iha 11 Abril 2018, JSMP kontinua realiza treinamento iha Suku Liho, Postu Administrativu Railaco, Munisípiu Ermera. Partisipante sira kompostu hosi xefe suku, membru konsellu suku no membru komunidade balun. Totál partisipante hamutuk ema na'in 30 kompostu hosi feto 9 no mane 21.

“Treinamento ne’ e parte ida hosi atividade habelar informasaun ba públigu ne’ebé ho objetivu atu hasa’ e no hakle’ an tan koñesimentu líderansa komunitáriu no membru komunidade sira-nian kona-ba funzionamentu sistema política nomós sistema justisa formál iha Timor-Leste”, dehan Diretor Ezekutivu JSMP, Luis de Oliveira Sampaio.

‘Atividade ne’ e importante tanba bele promove partisipasaun elementu sosiedade hotu-hotu iha política nomós promove asesu ba justisa formál, liuhosi hasa’ e sira-nia koñesimentu ne’ebé adekuada kona-ba lei relevante sira nune’ e sira bele trata kazu sira ne’ebé mosu iha sira-nia suku laran tuir mekanizmu ne’ebé loos no própriu’, nia hatutan.

Materia ba treinamento ne’ e iha sesaun rua. Sesaun dahuluk kona-ba demokrázia, knaar órgaun soberanu sira-nian no partisipasaun públigu iha prosesu halo lei. Sesaun daruak nian kona-ba funzionamentu sistema justisa formál iha Timor-Leste.

Iha sesaun dahuluk nian, asuntu ne’ebé partisipante sira foti mak relasiona ho formasaun Governu Konstitusionál VII, disolusaun Parlamentu Nasional no eleisaun antesipada. Partisipante sira husu katak tanba sa mak forma tiha governu ona tenke halo fali eleisaun antesipada no ne’ e tuir lei ka lae? Partisipante sira mós husu kona-ba ezisténsia governu nian depoisde disolve tiha Parlamentu Nasional?

Hatan ba kestaun sira ne’ e, JSMP esplika katak desizaun hotu-hotu ne’ebé órgaun sira Estadu nian foti la bele ses hosi Konstituisaun no lei sira, tanba Timor-Leste nu’udar Estadu-Direitu (Estadu ne’ebé tuir-lei). Governu Konstitusionál VII la bele kontinua tanba bainhira partidu KHUNTO dada-an sai hosi koligasaun iha 13 Setembru 2017, forsa política koligasaun ne’ebé lidera hosi Fretelin sai minoria iha Parlamentu Nasional nune’ e la iha estabilidade governativa no

programa ne'ebé lori ba Parlamentu Nasional hetan rejeisaun hosi Partidu Koligasaun Maioria Parlamentár.

Prezidente Repúblika iha razaun fundamentada no baze konstitusionál rua atu dissolve Parlamentu Nasional no dekreta eleisaun antesipada. Razaun dahuluk mak liu tiha loran 60 ona Parlamentu Nasional seidauk aprova orsamentu jerál estadu 2018 nian, ne'ebé tuir Artigu 86 f) Konstituisaun RDTL tama ona ba krize institusionál grave. Razaun daruak mak bainhira sura hosi data fó-sai rezultadu eleisaun parlamentár data disolusaun Parlamentu, tempu liu ona fulan neen, ne'ebé tuir Artigu 100 1) Konstituisaun RDTL bele dissolve ona Parlamentu.

Enkuantu kestaun ezisténsia governu nian depoisde eleisaun, JSMP esplika katak Governu tuir Konstituisaun iha funsaun rua. Funsau ida hanesan órgaun política no ida seluk hanesan órgaun administrativu, hanesan prevee iha Artigu 103 Konstituisaun RDTL. Governu hanesan órgaun administrativu la bele para nia servisu, tanba bainhira para, Estadu tomak la bele funsiona ona no ida-ne'e bele prejudika liután ezisténia estadu nian tomak no bele hamosu krize ne'ebé boot liu.

Iha parte sesaun daruak nian, kestaun sira balun ne'ebé partisipante sira foti mak kona-ba tanba sa mak xefe suku no nia estrutura suku la bele foti desizaun kona-ba loos no sala bainhira mosu problema rumá iha suku laran? Hatan ba kestaun ne'e, JSMP esplika katak xefe suku no estrutura suku bele rezolve problema balun tuir mekanizmu tradisionál, liu-liu kazu sira ho natureza sivíl, bele iha opsaun oioin hanesan halo mediasaun. Maibé bainhira iha kazu sira ne'ebé akontese konstitui nu'udar kazu krime, iha ona denúnsia ka keixa, nia prosesu sei la para mezmuke rezolve tiha ona ho mekanizmu tradisionál iha nível suku. Wainhira tama ona iha prosesu investigasaun no lori ba julgamentu sei iha possibilidade atu dada fali kazu liuhosi prosesu konsiliasaun ba kazu krime semi-públiku bele para bainhira vítima rasik hakarak.

Iha Artigu 23 alineia x) Lei Nú. 9/2016 kona-ba Lei Suku nian prevee mós kona-ba knaar autoridade lokál sira-nian hodi sensebiliza no mobiliza membru komunidade suku atu halakon krime violénsia doméstica iha suku laran. Lei ne'e fó responsabilidde atu prevene no halakon krime ne'e, la'ós atu rezolve.

Partisipante sira sente kontente ho prezensa JSMP nian hodi fahe materia sira ne'e. Partisipante sira husu atu treinamentu hanesan ne'e la bele halo loran ida de'it. Iha sesaun enseramentu, Xefe Suku Liho, rekomenda ba JSMP atu iha futuru, bainhira organiza fali treinamentu hanesan, bele organiza iha nível Postu Administrativu atu bele konvida xefe suku sira hotu iha Postu Administrativu Railaco nian hodi bele partisipa. Xefe suku ne'e konsidera materia ne'e importante no relevante tebes ho sira-nia servisu lorloron nian iha sira nia suku. Informasaun importante sira ne'e bele tulun xefe suku no sira-nia estrutura suku atu hala'o sira-nia knaar tuir dalan ne'ebé loos no tuir lei. Xefe suku mós rekomenda ba xefe aldeia no delegadu sira atu organiza enkontru iha sira-nia aldeia atu bele hatutan tan informasaun sira ne'e ba membru komunidade sira seluk.

Atividade treinamentu ne'e, realiza tanba hetan apoio finanseiru hosi Governu Austrália liuhosi Embaxada Austrália iha Timor-Leste ne'ebé jere hosi CARNO.

Atu hetan informasaun liután favór kontaktu direitamente:

Luis de Oliveira Sampaio

Diretor Ezekutivu JSMP

E-mail: [luis@jsmp.tl](mailto:luis@jsmp.tl)